

Os grupos Alternativa dos Veciños, BNG-Asembleas Abertas, Compostela Aberta, Marea Atlántica, PSdG-PSOE e Partido Popular presentan a seguinte

## **Declaración institucional sobre a atención a mulleres con endometriose e divulgación da doenza na Deputación da Coruña**

### EXPOSICIÓN DE MOTIVOS

A endometriose é unha doenza inflamatoria, progresiva, estrógeno-dependente, de orixe descoñecida. Consiste na implantación e crecemento benigno de tecido endometrial (glándulas e estroma) fóra do útero, na gran maioría dos casos no peritoneo pélvico e os ovarios, pero que pode afectar calquera parte do corpo da muller. A extensión da doenza varía dende poucas e pequenas lesións ata grandes endometriomas ováricos e/ou grandes e extensos nódulos ou fibroses e adherencias que causan unha severa distorsión da anatomía da muller.

O tecido endometrial pode extenderse por ovarios, peritoneo, ligamentos uterosacros e fondo de saco de Douglas, sendo menos frecuente fóra da pelve, aínda que pode afectar a calquera órgano (pulmóns, meninxes, etc.). Na pelve pode invadir órganos diferentes dos xenitais internos, como o intestino, frecuentemente recto e/ou sigma, a vexiga e os uréteres. Noutras ocasións o tecido endometrial ectópico localízase no propio útero, fóra do seu emprazamento normal, producindo unha variante de endometriose chamada adenomiose que pode ser difusa ou focal.

Adoita clasificarse a endometriose en 4 graos, segundo o nivel de infiltración do tecido, e non se pode correlacionar o estadio co tipo e/ou severidade dos síntomas e o seu pronóstico, nin tampouco co pronóstico de infertilidade.

Segundo os estudos, a endometriose afecta ao 10% das mulleres en idade fértil. De se confirmar este dato, en Galicia habería máis de 60.000 mulleres afectadas por endometriose, das cales o 15% teñen formas severas da doenza, o que suporía arredor de 9.000 mulleres.

A endometriose, ademais de poder resultar incapacitante para a muller, implica en moitos casos un grave problema de infertilidade.

O retraso medio do diagnóstico é de 8 anos, e vén dado por dúas causas fundamentais:

1. O descoñecemento da doenza e dos seus síntomas por parte das mulleres.

2. A pouca atención que, ata o momento, o sistema sanitario prestou aos síntomas da endometriose, asociando falsamente a regra coa dor, e normalizando este síntoma principal da doenza.

Por todo isto os grupos asinantes presentan ao Pleno para o seu debate e aprobación os seguintes

#### ACORDOS:

1. A Deputación da Coruña instará por escrito ao **Sergas e á EOXI** da Coruña, Santiago de Compostela e Ferrol para que proceda a
  - 1.1. Establecer unha programación de xornadas de formación sobre endometriose ás que poida acudir o persoal sanitario que atende os distintos servizos que dispensa o SERGAS no nosa provincia (facultativos de primaria e especializada, enfermería, matronas, fisioterapeutas, terapeutas...).
  - 1.2. Garantir consultas específicas de Endometriose suficientes para o número de afectadas das distintas áreas nos Hospitais aos que acoden as mulleres da provincia da Coruña e á derivación destas pacientes a áreas nas que existan mentres estas non se creen.
  - 1.3. Crear unha unidade multidisciplinar composta por especialistas en xinecoloxía, radioloxía, cirurxía xeral con experiencia en cirurxía colo-rectal, uroloxía, anestesias, psicoloxía ,fisioterapia, especialistas en dor, etc., para mellorar a atención nos casos máis graves de endometriose e á derivación destas pacientes a unidades multidisciplinares doutras áreas sanitarias mentres estas non existan.
2. A Deputación da Coruña instará por escrito á **Consellería de sanidade** a:
  - 2.1. Dar cumprimento á moción que por unanimidade aprobaron todos os grupos políticos da cámara o 22 de abril de 2015 sobre endometriose e que recollía en gran medida as demandas das mulleres afectadas por esta doenza.
  - 2.2. Facilitar ás mulleres con endometriose un mellor acceso aos tratamentos de fertilidade nos hospitais públicos (mellora nas listas de espera, facilidades para conxelación de ovocitos antes de cirurxías e tratamentos que poidan afectar á súa calidade ovárica, así como a execución de campañas de ovodoazón destinadas a captar doantes na sanidade pública).
3. A Deputación da Coruña instará por escrito ao **Ministerio de Sanidade** a:
  - 3.1. Convocar un Consello interterritorial no que se aborde este tema e se estableza un plan estatal de endometriose no que se comprometan investimentos para a mellora da formación do persoal e a divulgación da doenza entre a poboación feminina.
  - 3.2. Incluir na carteira de medicación financiada a totalidade de medicamentos subministrados a mulleres con endometriose.
4. A Deputación da Coruña comprométese a solicitar aos **Institutos de Investigación públicos galegos** que desenvolvan proxectos de investigación da endometriose.

5. A Deputación da Coruña comprométese a colaborar nas campañas informativas entre mozas de 12-18 anos nos centros educativos da nosa provincia para dar a coñecer a doenza.

O Voceiro do Grupo Provincial  
ALTERNATIVA DOS VECIÑOS

O Voceiro do Grupo Provincial PARTIDO  
SOCIALISTA DE GALICIA-PSOE

Asdo.: Ángel García Seoane

Asdo.: Bernardo Fernández Piñeiro

O Voceiro do Grupo Provincial  
BLOQUE NACIONALISTA GALEGO

O Voceiro do Grupo Provincial  
MAREA ATLÁNTICA

Asdo.: Xosé Regueira Varela

Asdo.: Daniel Díaz Grandío

O Voceiro do Grupo Provincial  
COMPOSTELA ABERTA

O Voceiro do Grupo Provincial  
PARTIDO POPULAR

Asdo.: Manuel Dios Diz

Asdo.: Agustín Hernández Fdez. de Rojas